

ALAHADY - FAHA 7 MANDAVANTAONA - A



Raha misy tia Ahy, hitandrina ny teniko izy, ka ho tian'ny Raiko; ary hankao aminy Izahay, ka honina ao aminy.

Ry Kristianina havana, mitohy hatrany ny fandalinantsika ny toriteny nataon'i Jesoa teo antendrombohitra, izay nolazaintsika fa sata nanorenany ny fiainana maha Kristianina atsika izany hoe fiainan'ireo izay manara-dia azy hivelona an'izay aina natolony teo amin'ny hazo fijaliana ka hahatonga an'izy ireo ho zanak'Andriamanitra, ho vahoakan'Andriamanitra, ho olo araiky amin'Andriamanitra. Efa ho herinandro maromaro no nandinihantsika an'izany, nanomboka

tamin'ny nanoloran'i Jesoa ny hasambarana valo na sivy no tena marimarina kokoa, ny fahasivy manambara ny hoe rehefa tena miombona amin'i Kristy isika dia aza gaga raha misy manenjika. Amin'izao Alahady faha-7 mandavantaona izao, ao amin'ny Evanjely toko faha-5 Md Matio no hahitantsika ny hafatr'i Jesoa ho an'izay te-hanaradia azy.

Vakiteny I : Lev. 19: 1 - 2, 17 - 18
Tononkira : Sal. 103: 1 - 2, 3 - 4, 8,
10, 12 - 13
Vakiteny II : 1 Kor. 3: 16 - 23
Evanjely : Mt. 5: 38 - 48

Aoka ho masina tahaka ny Ray isika raha te hanaradia azy, izy izay mampiposaka ny masoandro ho an'ny rehetra tsy misy avakavaka ary dia izay koa no tian'i Kristy hiainantsika ; hanana ny fitiavana izay fitiavana lavorary ao amin'Andriamanitra dia ilay fitiavan'Andriamanitra tsy manavakavaka. Tiany isika hanana an'izany fitiavana izany ary hitia hatramin'ireo fahavalo aza. Izany no fomba tian'i Kristy hitiavantsika. Hasoavintsika ary amin'ny alalan'izany fitiavana izany na dia ny fahavalo aza, ny hampiova ny fony no tanjona. Tsy hoe hanao soa fotsiny ireo fahavalo na ireo manenjika isika fa ny

tadiavin'i Jesoa koa amin'ny alalan'ilay hafatra hoe : raha hanahaka ny fahamasinan'Andriamanitra, ny fiombonana ao amin'Andriamnaitra dia tsy hoe hanao zavatra fotsiny amin'izao amin'ny fahavalo fa ny hahatonga azy hibebaka, hihavao sy hihatsara rehefa mahita ny ataontsika. Izany indrindra no hafatra tian'ny Eglizy hampitaina amintsika amin'izao Alahady faha-7 mandavataona izao.

Araky ny voalozan'ireo vakiteny dia nampitain'Andriamanitra tamin'i Moizy izany hafatra izany ! Aoka ho masina ianareo tahaka ny maha masina an'Andriamanitra, io no vakiteny voalohany ao amin'ny Levitika (*Lev. 19: 1 - 2, 17 - 18*). Ny Tompo Andriamanitra tiavaina sy hajaina dia masina indrindra, ka antsoiny isika tsirairary ho masina tahaka azy ka amin'izay dia tena ho zanany sy ho vahoakany tokoa. Tsy misy fetra ny fitiavan'Andriamanitra, ary izany ny fitiavana ampianarin'i Kristy antsika ao amin'ny Evanjely.

Ho raisintsika izao mba hahatonga atsika hiombona aminy bebe kokoa amin'ny fiainantsika andavanandro dia tsy inona fa ny mitia fahavalo araka ny efa nolazaintsika teo.

Raha ho dinihina akaiky izay voalaza izay dia aoka amin'ny alalan'ny tsara no hanaovantsika ny zavadrehetra, ho valio amin'ny tsara izay manao ratsy anao. Ny tsara izany no entintsika handavorariana ny fiainantsika ary izay no mitondra atsika amin'ny fahamasinana fa tsy ny valifaty. Fantantsika ny vokatr'izany dia ny lolompo sy ny korontana. Hitantsika ireny herisetra manapotika atsika ireny hatramin'ny tsy manantsiny aza no voapotika noho ny hetraketantsika, ny lolompo, ny valifaty dia potika ny fiainantsika.

Aoka ary hanana fitiavana isika, fitiavana tsy misy takalo, fitiavana maimaim-poana, "*Homeo hanina izay mangataka aminareo*", ary araky ny hafatr'i Jesoa io, "*Aza ilaoza-mihataka izay te hisambotra aminao*", izany hoe ataovy izay asa fanasoavana rehetra ary amin'ny alalan'izay no maha fanasina sy fahazavana atsika araka ny hafatra henontsika tamin'ny Alahady faha-6 lasa teo.

Tanteraka izany raha ny hafatry Md Paoly amin'ny vakiteny faharoa (*1 Kor. 3: 16 - 23*) io no entintsika ho filamatra amin'ity herinandro ity : Aoka ho tempoly ianareo, izany hoe Eglizy, ary io no efa naverimberintsika matetika fa indrindra amin'izao taona handalinantsika manokana an'i Kristy mpiara-belona amintsika, sy mpiara-dàlana amintsika. Eglizy isika, tempoly, raha tempoly tokoa isika dia mivavaka amin'izay ny zavatra rehetra dia ataontsika amin'ny alalany sy miaraka aminy ary ao aminy ary izay no tena fahendrena marina indrindra, voalozan'i Md Paoly amin'io vakiteny io : "*Satria ny fahendren'izao tontolo izao, dia fahadalana eo anatrehan'Andriamanitra, araka ny voasoratra hoe: Ny hafetsen'ny hendry no hamandrihako azy; ary koa hoe: Fantatry ny Tompo ny hevitra ny hendry, ary fantany fa zava-poana izany*" Aoka ary ho ao amin'Andriamanitra tokoa no hanovozantsika ny fahendrena rehetra satria ny ankoatr'izay dia ny hafetsena, ny lolompo izay mitondra amin'ny herisetra sy ny fahafatesana ka manapotika ny tontolo iainana.

Hitantsika ny doro tanety, ny tevy ala ataontsika, aoka isika mba hihavao satria isika no tempolin'Andriamanitra, raha tempoly isika dia eo anivontsika Andriamanitra ary masina isika raha eo anivontsika ny fitiavana manasoana ny hafa, ary hitady izay mahasoana ny manodidina atsika, hikatsaka mandrakariva ny hampanjakana ny rariny sy ny hitsiny ka tsy ho hisy intsony hy hafetsena sy fitapitaka fa anaty fahamarinana isika izay no manamarina fa ilay Kristy no miara-belona sy

miara-dàlana amintsika ary eo anivontsika tokoa ka hahafahantsika manambara fa mpanara-dia azy tokoa isika ary tena Kristianina tokoa araka ny hafatri Md Paoly io : Aoka tsy hirehareha na poerapoera noho izany isika fa aoka hanana an'izay endrik'i Kristy ao amintsika izay, tsy hirehareha isika fa zanan'Andriamanitra ao anatin'ny fanetrentena *“Koa aza misy manao olona ho reharehany, fa anareo ny zavatra rehetra, na i Paoly, na i Apôlô, na i Sefasy, na izao tontolo izao, na fiainana na fahafatesana, na ny zavatra ankehitriny, na ny zavatra ho avy: anareo avokoa izany rehetra izany; ianareo kosa an'i Kristy, ary i Kristy an'Andriamanitra.”*

Isika ao amin'i Kristy no maha Kristianina atsika, tsy lavitra izy fa miara-belona amintsika, eo anivon'ny fiainantsika. Rehefa izy eo anivon'ny fiainantsika dia izy manamasina atsika. Amen

Mompera Arseveka Mgr Benjamin Ramaroson